



V Vinus apud Germaniæ Vādalos uir magni nominis extitit. Nam amplissimam regiōis partem possidebat, atq; suæ uirtutis multa documenta edebat, anno Christi octuagesimo. Hunc Starcatherus fortissimus athleta sociū asciuit, atq; uiribus coniunctis contra Orientales populos à Danis deficientes pugnavit. In eo bello Curetes & Sembi, qui hodie Liuones & Prussi dicuntur, superati fuerunt. Habebat Vuinus in suo exercitu multas mulieres uiris mixtas, quæ & ipsæ fortiter decertantes suæ genti magnam autoritatem compararunt. Ab hoc Vuino pars Vuandalorum Vuinuli dicti fuerunt. Alb. Sax. in Vandal. lib. 1. cap. 11.